

四庫全書

集部

欽定四庫全書

集部

江湖長翁集

目錄
卷二

詳校官庶吉士臣吳烜

主事臣呂雲棟覆勘

覆校官博士臣劉光第

校對官典簿臣劉景岳

謄錄監生臣龔輝遠

欽定四庫全書

集部四

江湖長翁集目錄

別集類三

宋

卷一

辭賦二十首

卷二

五言古詩七十七首

卷三

五言古詩八十八首

卷四

五言古詩八十一首

卷五

五言古詩六十八首

卷六

五言古詩五十七首

附

四言四首

卷七

七言古詩五十首

卷八

七言古詩四十九首

卷九

七言古詩四十七首

卷十

七言古詩四十二首

卷十一

五言律詩一百九十六首

附

排律十首

卷十二

七言律詩一百零三首

卷十三

七言律詩八十三首

卷十四

七言律詩八十三首

卷十五

七言律詩九十八首

卷十六

七言律詩九十八首

卷十七

五六言絕句四十六首

卷十八

七言絕句二百五十二首

卷十九

七言絕句二百三十七首

卷二十

七言絕句二百二十首

卷二十一

記十九首

卷二十二

記十八首

卷二十三

序二十八首

卷二十四

書四首

卷二十五

書十首

卷二十六

書十七首

卷二十七

劄子三首

卷二十八

劄子十一首

卷二十九

傳贊銘箴偈說共二十七首

卷三十

文四十八首

卷三十一

題跋五十七首

卷三十二

論九首

卷三十三

策問三十四首

卷三十四

易說十四首

卷三十五

誌狀十一首

卷三十六

表牋六十四首

卷三十七

啟三十七首

卷三十八

啟三十三首

卷三十九

疏青詞九十四首

卷四十

致語上梁文二十六首

臣等謹案江湖長翁文集四十卷宋陳造撰
造字唐卿高郵人淳熙二年進士官至淮南
西路安撫司參議遭宋不競事多齟齬自以
為無補於世置之江湖乃宜遂號江湖長翁
造既不竟其用故事功不著於當時史亦不
為立傳元申屠駟為造作墓誌稱其於誨誘

則良師於撫字則循吏身篤操修道無體用
雖金石之文稱述類多溢量而當時未聞異
論則亦非純構虛詞也集中如罪言一篇專
論應敵備用之畧蓋仿杜牧而作所言雖未
必悉當而比於牧則不足比於陳亮劉過則
恢奇排募可以肩隨其他劄子諸篇亦多剴
切詳明不徒託之空言記序各體極字鍊詞
稍覺有傷真氣而皆謹嚴有法綜其大要猶

為不失典型在南宋諸作者中亦鐵中錚錚者矣至易說一卷始於无妄終於比凡十五篇疑其未竟之書中多以史證經乃楊萬里誠齋易說李光讀易詳說之流殆為時事而發託之詁經歟其集久無刻本明季之藻以淮南自秦觀而後惟造有名於時始與觀集同刻之於高郵其中青詞疏語諸篇均非文章正軌今以集祇抄錄亦姑仍其舊附存於

卷內云乾隆四十二年三月恭校上

總纂官臣紀昀臣陸錫熊臣孫士毅

總校官臣陸費墀

欽定四庫全書

江湖長翁集卷一

宋 陳造 撰

楚辭古賦

送龍辭三章

沈燎兮桂醕笳蕭嗚嗚兮逢逢其鼓緩吳歆兮蹌越舞
送龍兮歸處龍之歸兮悅娛翻倒霄霏兮膠轕霧雨厯
館娃兮不畱過胥口兮小顧水天模糊兮迷仰俯僊真
迎兮排空蛟鼉駢羅兮而在下祥飈肅兮綠輿非煙幕

欽定四庫全書

兮紫府翹儂望兮何所目屯雲兮南驚心靡迤兮延佇

其二

旱氛兮炎浮地毛焦兮金石為流龍不來兮殷憂心憚
怵兮孰謀戴儂目兮倏龍之遊龍翩然兮副求呵蟄雷
兮鞭潛虬忽墨雲之崩騰空灑兮黠黠曹夫昏晝擬甲
馬之喧空兮若飛練之淙溜夫豈不能噓膚寸彌六幕
兮胡嗇其施於此州眷吾儂龍所私兮匪新而舊安棲
飽茹兮龍之佑願龍兮千萬壽暨我子孫兮烝嘗春秋

其三

雷車轡兮電焱熹孽氛靜兮旱魃摧龍之來兮慰我思
翠其幢兮羽旗乘煥燿兮紛躡踞龍之去兮盍徐之蜚
雨兮一旦再室予居兮穀予饑眷他州之枵播兮匪龍
其吾曷依東阡北陌兮謳而嬉右湖左海兮夜不扉林
屋之洞兮蟠翠微瓊食兮貝宮雲璈兮玉妃奠龍居兮
無愧功成兮龍則歸送龍兮陳辭溪藻芡兮山有巖薇
餞吾歸兮幾時

行春辭三首

白沙兮青莎徐予車兮坡陀黓屯雲兮閣雨沸後海兮
起波紛稚綠與小紅媚丰潤兮靚嘉聲禽鳥之啾喏偕
人語兮相和驚鷄蜚而跳犢兮儼倦憇之人家翫歲華
之俛仰兮復躑躅而此過彼何人兮駢首爭指似兮笑
譁鏗有聲兮長謠疑其賡為于之歌

其二

訟謀兮糾紛榜槓兮未全閑色不形兮意孚每厚顏於

曩賢揖父兄兮使前尚笑語之怡然道菽粟兮卒歲審
里閭之相安食三鬴兮袴襦悼單枵於昔年我酒旨而
肴可茹兮屬饜兮共此梓觴一行而三謝兮起且坐而
誼繁歸目送而扶路兮予亦倦踞而假僧氈

其三

懣官曹兮縛虎擁簿領以昏憤竊逍遙於數刻償澗汨
於終歲倚僧垣睨鴻影兮滌胸塵而一快飯雲子而泛
乳兮引吟興之未沫吾西道之主人兮有老禪之晤對

愈雙矐之月淨兮館授予而已再頑予姿之麇鹿兮合
巖栖而釣瀨悅泉石之入眼兮浩歸懷之自倍計三徑
之可具兮顧二頃之猶在明年其餞西歸兮將家漁舟
老牛背也

楚辭三章送郭教授趨朝

昔尚父之之國嘗寢甘而見譏懷與安其費日亦館人
之或知豈以抱當世之志而常後可為之時耶有美一
人兮居今而與古謀氣飄蕭兮好脩邑中之哲兮獨能

闖閫寔於軻邱扈芷蘅兮荃其佩櫝驪珠兮匣干將而未試雖未試吾何慊兮顧簪裳猶可隱蝸廬槃礴兮天地儼其蓋軫一世繫望兮如蒼生何君何心兮山之阿
欒甕社兮羞藻芹無為此焉婆娑

其二

儒之宮兮千柱眈如莪冠綺袂兮羣而趨食焉稻魚兮
隸焉詩書我侈其成兮繹其初誨掖之孔敏兮築興之
不徐債於昔煥於今兮繫百年其有待企三賢而相攸

兮遺躅未沫匪若人之良茂兮吾將奚賴片波搖日兮
槐陰轉午一塵不棲兮重廊邃宇執經前兮儀儀而訐
訐君顏舒舒兮而究而語有粹其文兮有覲其古風舞
雩兮步趨繩矩鄙人留眼兮夫也接前人之武人今翩
鴻兮與南翔雲氣蓬瀛分覲虛皇膏馥霑被兮淮之鄉
君之惠兮鄉之人不可忘

其三

爰有人兮嬖冊偏側耕耘寒暑兮圖史儒墨吟抱膝兮

山南水北佩明月兮冠切雲曳芙蓉兮敷芬冰其茹兮
蕙其薰之於世曾莫諒兮蹇吾猶淮之漬塊予揆夫初
度兮磷競彊而為懦髮之新兮志偕而墮非金玉之人
兮孰振吾過有牽其復兮有倡其和完予獨而息黥兮
覲新功以自課一息恍三秋兮胡為去我而他之些君
行兮指日邊章陳兮君席為前揖風袂之翩翩壽君兮
綠樽貝宮靚深兮碧落寬陵天風兮整羽翰君無謂予
兮考槃有塵冠兮待彈

問月樓賦

休予暇兮銷憂緣空闊兮躡飛浮小萬象以孤凌聊徙
倚兮茲樓主人敬客玉其醴而瑤舟忽霜月之飛來傍
欄角兮窺簾鈎媚客衣而不去疑即人而有求俯皓魄
以可攬宜致辭而見酬挈吾所疑舉其維陬曰厥分天
地則有此月乘空明鏡寥泐零沆瀣噴玉雪知廣袤兮
幾何曾珠宮而貝闕瑰僊子之幽獨儼童顏而紺髮是
耶非耶肇為此說藥白丹成兮孰所瘳茹桂枝漂香兮

何許根蘖玉斧兮何用修妖墓兮胡此穴寒可禦兮何
術筋可昇兮似譎珠何賴兮壞成之異潮何待兮隆殺
之絕方中兮俄墜適圓兮復缺奚所恨而頓虧誰所役
而遽沒世同普此請究終始主人長笑避席而起酌酒
謂客毋泰多事萬古兮明月短生兮客子彼高闕於起
滅此同囿於生死一歡乘興且用慰喜若夫南浦結恨
幽閨凝淚窮簷漏屋之瑣尾孰若茲樓之尺咫微之弦
暝之晦煙霏之陰曠風雨之披靡孰若晴霄之如洗偕

良會於今夕嗟百年兮有幾底用計茫昧之傳聞研愴
恍於非是吾肴則豐吾酒甚旨姑可置興亡於度外冥
身世於一醉客曰噫哉長喙大哈迭勸更酢挹瓶注壘
撫月姊於座隅啐桂影於瑤杯誦楚騷鎗吳歛信醉山
之欲頽啟明上寒鷄催羲馭駢車回冒軟紅之舊塵
况市聲之隱雷

定觀賦

張君錫雱不利秋闈作賦見遺辭意竒壯作定觀賦荅

之其辭曰

面頰之敷腴胸襟之恢疎譚辨之傾輸子張子眇眇高
蹈力雄萬夫我擘雋於南州闖風壑之於菟揆若人而
當價金華蓬山信其有餘固豈山澤之懼儒也哉胡乃
蘭傷玉缺嬖姍嬖嬖黃金注而得昏美璞獻而遭刖撫
蒯緱而三嘆駭霜蹄之一蹶方且寓喑鳴於雕蟲之技
陶性真於盃中之物陳子曉之曰事之宜然而或不然
者天之勝宜然而不得不然者人之定洞視天人之表

而不吾滑焉君子之善應鄉也覲然笑今也怒然悲蓋
未始得其正彼其搖搖於寵辱之樊皆於理聽之瑩乎
夫聖之逐忠之剖賢也而臞盜也而壽理好乖於所期
是固諉天者得以啟其口羿之射有撥其矢石之斤或
掣其肘然竟非拙工之敢偶蒲捐以一跌而棄夜光以
微類而培孰不市駿議寶者之咎以定觀之人之勝天
也久矣子其尊所有勉所無臯屬文藝之藪周旋道德
之塗吾見夫至寶橫道隨和過之必且攘取而疾趨則

夫債於前而振於後遺之寸而收之尺顧何歎歟彼託
意於酒者古人有之而或以蕩心而敗德聲其怨於文
者君子許之猶未足與語超然自得之徒羗吾言之率
爾子其繹之是邪非乎子張子作而謝之其貌舒舒其
氣愉愉若不知得喪欣戚之何如

聽雨賦

步前楹瞻列星問雨而愍晴雲河斜澹淡明悲喟於邑
退坐風櫺憂而倦倦而寐寐而驚進新涼響微零下簷

隙喧中庭策策而丁丁琅琅而玲玲非琴非筑金撞而
玉琤俄馬建之瓴盆之傾懸麻澍澠雜流泉之洶駭亂
甲馬之逐轟喜躍蹶起呼兒晤聽時也燥枯煖焚自夏
而秋東驚西馳哀祈乞靈款龍湫叩神扃奠斯幣而刑
牲者蓋無虛日今始聆乎此聲苗悴悴而將槁悵此願
之莫憑脫如願也槁者已矣悴者庶其復榮今茲之雨
雖云後而尚及事坐想夫南規北酉遠隴近平在谷滿
谷在坑滿坑自今以始畎澮之淺深溪澍之縱橫淙虹

兮萬斛之傾輸鏡澈兮千頃之泓渟映涼葉之朝翻涵
嫩畦之夜青苞者攢梨秀者森芒兮莫不引稚而抽萌
惟感歎咤者生意之頓回奔騫跼躄者舞踊而經營洗
襁子之昔憂歛春臺之共登且得以殺吾顏之駢頰息
勞慮之怵怵蓋去國積年者繫夢於鄉枌枵腹彌日者
動喙於藜藿一旦陞堂皇揖父兄嘗稻梁飫侯鯖冀幸
禱祠而不獲者不啻疇之渠此樂之易名而况匪輔胡
車匪根曷莖凡吏之安否視戚休於下究其理民則重

而吏輕今者里詠塗歌含哺擊壤之餘尚不釋然也夫
豈其情燭既跋僕屢更我瓶斯卧爾歌載賡呢鄰鷄之
既鳴

後囚山賦

余子為房之獄官四十閱月代者乃來而以事留留非
其罪房風土甚不宜人袖二賦見投時秋高矣有可憐
者因作後囚山秋蟲二賦寬之且以自慰旅寓也

柳先生蛻迹中朝落身南州即囚山而命賦寫胸次之

幽憂讀者哀之至今心為之悽怆而聲為之悲啾房陵
斗州窮巖絕隘裂石廩之一罅瞰千室而斯在層峰疊
嶂自蜀而東亘二千里此焉未沫嘗憑高而舒望取羣
愁之一快拖頑蒼繚寒碧兮了不究其所屈騰陵勃怒
崩轟闐沓植則困縈則帶直矗焉如郭銳焉如鑿馳萬馬
於曠莽翔羣龍於霏靄又似夫颶風之塵萬艘翻濤瀾
於渤澥天雲若可手擘而日月為之隔闕嗟予與子胡
此焉仕按亦簿領庭亦卒史居無以泰吾心而遊無以

投吾趾時則誦柳先生之賦而知其有以也夫其猿顛
鳥仆窮號懾墮真狴犴之可駭也出不易入不可出
幽僻塊處荒傖癯民悍容而獐音日接乎前幾刻木之
與對也嵐昏澇朝黯掩瞶晦僵人骨而酸鼻亭午未已
仡仡者病壯者廢也由漢暨唐王公貴人悖而罪劣可
矜貸毋比來之昧也自我解裝歲律甫遷向行止之坎
流今匣兕而針氈嗟若余子盤礴四年局不得歸欲語
復茹反諸已而靡愆袖長賦而見投慨今昔而潛然痛

亂山之見囚束寸步而莫前牢愁幽憤搗腸淪髓匪接
摺而踣頓不繼檻而倚止何高高之不仁而使我至於
此也蓋嘗繹子辭究諸理子之所以惻愴而自悼我之
所以感動而促戚者君子有弗是也彼漢唐之逐臣例
庸房之廢徙則亦干國之憲不容自己吾與子來其始
誰使非以其窮塗之絕援資身之無策博斗升以飽饑
而遁死如庸賈之走荒裔罷農之守境墾曾不暇計去
取於彼此也耶以吾校子又進退之異趨齒髮之懸殊

環索吾中稿涸而空無彼子柳子跣劉躡呂豪韓與徒
若韋中立吳武陵之桀然方且望塵躡影蔑齊其驅彼
其一旦跼躄於嵌嶄巖阻之幽深宜其號鳴悼惜不能
一朝以居予之朱愚質之朴疎才之卑迂萬非時須而
遽乃顰顙悼中悄焉慘焉以賊和而傷生夫何為乎訊
歸計於蟾蜍第圓缺之六七付古今於俛仰聽寒暑之
更迭雖浩劫之悠長尚激矢之漂疾吾方左右圖史深
居簡出揖勝友於南山料春色於九室壹不假犢背之

書超然乎紮維繫攀之表非三花老仙孰其委悉子以
吾言為何如余子謝之曰沈憂滯懣吾已失矣

秋蟲賦

金飈之淒清鴈空之澄凝叢悽聚悲而為萬壑之秋聲
非鐵心而木腸疇能不掉其魄而動情況夫唧唧切切
更應迭和自宇而戶彼何物耶如私語如怨愬如盆壘
之抽緒斷而復續專中宵而悲鳴有不聞爾信能令志
士之竊歎而思婦之涕零揆生世之幾時胡厯耳而女

聽子已冥蠻觸屏螟蠃捐青錢市黃糯盟新芻命白墮
究三齊之妙而供百榼之課彼夫鷄窓之雕鏤螢囊之
吾伊等夜蟲之么麼

遠宜亭賦

創小亭名而賦之曰遊女之翩翩望之疑仙也迫而視
之或不逮前奏樂于座鏗砮膠葛心之適耳之妍也有
不若張諸空曠聞之眇綿婉以清和而圓南山之信美
兮吾乃挹其杪顛惟夫近故湫束於闡堞蔽虧於市鄽

繫斯亭之表立峰岫隆嶺之嵐霏濃淡煙雲幻變按領
其全營斯名斯庸論時賢休暇日而一登是可以誦遠
遊賦超然也

志喜賦

五月十一日遊
代者途中作

出城陰而轉首緬散解之亭岩躡踈影於康莊翳纖雲
於晴霄揭石瀨之泓渟隱鱗甲之搖搖盼山凹之室廬
紛語笑之耕樵山鳥哢兮嘲啞野芳嫵兮妖韶駢萬景
之橫前壹詩題之見撩我肅客而暫來胡意氣之囂囂

揆歸塗之此由矧瓜期之匪遙從官牒之百舍寄十口
於萍漂寧簿領之憚煩而供饋之寂寥第松楸之繫懷
惜老鬢之日彫鬱還家之夙願中不火而每焦幸歲律
之再更驚此心而飛超忽合符之諗期慰跂望之無聊
秣吾馬兮脂牽挹阿丁而聯鑣亂清鏡於粉溪排擘絮
於山椒屈吾指兮寢久茲伊夕而匪朝躍脫檻之鷲獸
快辭鞫之皂鷗儼此樂之想像覺吟興之漂蕭歛憑軾
而坐寢夢已馳於外朝

淮海樓賦

帥相郭公即揚州南城為淮海樓偕客落成高郵陳造
在焉命之賦其辭曰

娛暇日以登覽兮若斯樓之巨麗
暝簷影於空闊兮循
雕欄而徙倚目定眎而猶眩兮足佇立而竦聽
棲浮靄
於朱甍兮遲羲馭於平楚來禽去鴈却略跼踖而揆去
兮霧霏幕爽翁聿而在下陵迥漢而蹇飛雲兮騫鵬舉
之垂天規萬井而數計兮挹峰磴之橫前吳封楚甸間

列疊出而自獻兮納納未憇明霞斷煙訝海門之塊峙
兮眇浮玉之一拳演江流之橫界兮衣帶之紆餘脩蟒
之蜿延曠莽恢大四向而無際兮簞衽席而瞭然我遊
武昌載登南樓想元規之遺躅洎典午之清流緬懷仲
宣登樓有作顧臨眺之信美終回遑而靡樂孰知夫曠
千載而相望巨賢否之俄度惟汾陽公分君相憂功存
宗祧身臨邊陲屹控阨之巨防躬熙代之康侯靜鎮榆
塞創為茲樓將厯覽而俯省目所圍之備周深計遠圖

寧為觀遊彼擁扇而障塵每解顏而借羞揮旌毒霧而少
彌肅賓僚之濟濟匪晉公之儀曹外郎陳思之程楊應
劉疇獲偕此玩面勢之隆崛瞰山川而顧指表桑麻中
甕宇揭舒畫軸兮對主賓之宴喜借胡牀於末席容霜
毛之客子儕氓屢而分惠殿羣英而薦醴浩逸興之漂
蕭豁幽懷而憑虛倚北戶以微睇儼桑粉之弊廬親色
笑於犀塵陪觴詠於晨鋪斬依劉之羈栖曾愴惻之不
無訂休戚於今昔詎劣優之錙銖夫此衆君子之所以

板援遇逢之厚幸顧餘漉之丐予者也羌勝集之超然
寧飫宴之云計究樂事之攸寓後謫僊而鮮繼進牘命
賦合辭一喙泚吾筆而長吟颯天風之搖袂

波光亭賦為帥相郭公作

汾王後身金阜老僊笑譚功名師友簡編手神丹而活
國身長城之護邊虎節所臨犢佩已捐興仆振盞車古
所傳有亭屹立城闌右偏插深池之清泚凌蒼靄而高
騫面勢之孤危簷榮之躡連在公之設張經畫纔太倉

之稊米已度越於後前想旌壽之每臨宛笙鶴之雲駟
賓從嫖嫖笑歌嬋娟掃亡國之淫哇奏新唱之清妍泛
淑景之香紅鏡靚粧於明燭接罷亞於畦疇眩縞潔於
山川春秋冬夏信非我有而我按與之周旋佳月上兮
闖冰奩微風動兮媚漪漣撫物而得之應世之心池月
之湛寂緯武有文風漪之自然推此用之躋世五三軼
勳四七將俯拾而需旃是猶衡氣機也耶世識之規恢
之後吾得之拱默之先彼不知者方以吾為億中而或

者必予其知言

延綠亭賦為高秀才作

子高子襟度脩然抱負崛竒辟俗如讐而愛客如色故
築亭寄隱屹莽蒼而瞰渺瀰方竭澤而揚塵喑吾遊之
不時因援毫而進牘聊想像而漱辭爾其泓渟兮鏡揭
浩泚兮天垂妥寒晶之如空湛蔚藍之無涯奏蛙吹以
分部凜冰崖之合圍素揚暉兮連娟紅倒影兮芳菲目
謀心愜把玩四時晴雨晦明雲煙紛披江籬芷蘅之綠

縲別崎枉渚之因依眩多景之偃蹇隱几者默焉袖手
領攬而無遺固可以動楚客之清吟抗陶觴而一揮況
夫挺萬蓋之傾歌覆千鞵之逶迤嫣然笑粲媚靚粧與
醉態或玉頰而冰肌無乃飛瓊姑射之姊似儔侶儷香
叢艷不招挽而陪隨彼翔翠碧於蘭苔點屬玉於淪漪
皓鶴側頸於淖瀦鵲鳩偵影於鯤魚烏鵲窺簷而諛語
意而拂袂而差池則皆怡然莫逆相晤忘機者也至其
樵歌之斷續漁笛之嗚咿欵乃之無惡聲苓箬之有安

棲塵外之適子其可私若乃悟直鉤之妙意飫葦間之
新得儵有至樂鷗無驚飛則又有以超然乎芸芸之表
豈獨詩可瓢而酒可卮予將為子飭道腴而醉真醇何
必要汗漫而與期

惟安堂賦

子鮑子為己之學經世之資投刃成風儒先吏師作為
新堂歸防暮遲惟安是名命陳子賦之陳子曰世有至
愉佚在已而非物士有真富貴非金紫之謂蓋是心也

以道寧以物礪寧之存礪之喪孰能名仕版而志漁樵
之往還身官箴而思滄州之浩蕩等聲利於桁楊睨遽
廬於伯王悅然乎進為悠悠乎去歸羌卷舒之無心豈
出處之異岐翳鹿門之衰翁若方伯之子浼偕子耕而
妻耨寧燠寒而飽餒曰遺安之是計終長往而不悔彼
陶翁之不屈為無食而暫出賦歸來而投簪徑反關而
容膝審吾身之易安顧何賴於紳笏惟子鮑子超然高
驥仁宅之為居兮匪義塗吾無行玩名理以自怡兮謹

邊幅而為防鼓吹乎諷吟介甲乎其溫良因時顯晦偕
道翱翔遂初可尋鷗盟不寒固優追元亮之高躅懷寶
不迷中外無擇又不屑龐翁之退藏雲脫岫以陰合水
反壑而鏡清異屈子兮衆皆醉如徐公兮世無常夫何
往而不安顧眷眷于斯堂惟厯聘而轍環曾仲尼之暖
席當去齊而濡滯孟子庶幾於齊國矧火暎之肆虐仰
嗣聖之旰食死徙蓋幾何人而焦勞莫乎生息行子學
以撫時吾固知可以寧奔迸而植僵踣俾橫目之同安

兮喜氣亦形於玉色是謂推已以及物心泰而罔咈與
夫蘄吾之安而土苴一世者於道孰為失得耶子鮑子
心融首肯乃言惟服

怡軒辭為臧子與作

金碧兮丹朱瓊其堂兮金鋪普危機之在是曾未間於
憂虞秀眉兮曼膚銜宮吐羽兮鎗金奏竽詫聚蚊兮一
醉竊暫快於營營之餘吾居兮若陋而安吾中兮若局
而舒陶冶兮羣書蕭散兮槁梧與俗兮風馬牛解卷兮

樞株拘子臧子所以自得而適而不知者以為疎而迂也
也胖吾體兮道之腴遊吾心兮化之初推而大之庶幾
孔氏之所謂忘憂顏子之所謂不愚蓋將挹古聖賢而
造膝雖造物者亦惡得而加諸

江湖長翁集卷一

欽定四庫全書

江湖長翁集卷二

宋 陳造 撰

五言古詩

和陶淵明二十首

予幼多病不能飲酒中年稍近杯勺延賓客對妻兒每

舉少分亦能數舉陶然足樂也頃以病復作絕不飲對飲者意輒為之酣適暇日讀淵明飲酒二十詩并東坡居士和章遂次其韻紹熙壬子閏二月定海邑齋

不計憂患場賢聖頗中之淮鄉酒價賤希復獨醒時齒
髮變今昔撫已屬負茲清坐挹飲客辭費未免疑客歡

我怡然此戒何妨持

壯歲銳著述曹欲藏名山中間忽自哂聒聒厭多言棄
置杯中樂雕鏤耗歲年不知百歲後何益空名傳

薄俗不難化君子要得情善政良易孚循良本無名一
從吏海邑我暇民樂生穿填虎自避心冥鷗不驚且了
飽飯課不問報政成

不念建德遊枉作心奮飛一溺狂泉飲坐受人所悲吾
樂有餘地醉鄉真可依酌觴初問塗啜醪便知歸棄置

近藥裏改絃計扶哀歡趣固自若誰謂志願違

捐金得嘉旨舉室更笑喧老子舊小戶醉帽每先偏即
今省酒費或辦歸買山吏隱有定趣縣債當亟還乘流
遇坎止畢世佩此言

張竦詆陳遵彼此竟誰是徐公今似優昔行未容毀中
年覆觴過畏病乃能爾兒輩無真見緼袍賢錦綺

海鄉亦好春紅紫紛蕤英黃鳥托庭柯啁啾如有情知
我得碧濤似勸花前傾豈知好飲客靜坐耐耳鳴茹津

折紅泥鯨吸看後生

碧濤酒名

骯髒老眉面豈是趨世姿
謬著百僚底
蹇蹇彊折枝
深
知才用短
敢謂時命奇
歸耕不顧計
更問婚娶為何向
不貧賤肯為寸祿羈

公朝不遺才
蕩蕩天門開
雜還盡奇士
騰凌舒壯懷
有
客尋遂初
與時自作乖
脫粟傲肉食
官居當巖棲
東州
拜墮書西州
迎芝泥夫也
商聲謳滿屋
金石諧詩書
孰
踐履簿領甘
沉迷平生獨
往願萬牛挽
莫回

自公有至樂詩卷還坐隅得句一吐之嬉然忘窮塗百
世一俯仰萬象付馳驅吟情當飲興其樂皆有餘役心
聲利場咄咄彼何居

卯金穿窬雄典午盜有道當時附炎人忍耻稱國老延
之終代北范粲車上槁矯矯竹林雋麴蘖豈真好陶公
諸公右烟若橫道寶不就酣酒逝亦恐自標表

訪書酒誥空揚子浪傷時頌德譽大人劉伶頗費辭人
生意行耳暇復商略茲用已律世人一信起千疑規規

滯所然在物寧非欺我心受風舟漂然隨所之

人生無賢愚彼是皆夢境矻矻迷所求冥冥睡未醒此
心方放紛息念乃要領衝風有驚波握苗無佳穎夢覺
悵今昔吾其默自炳

暇日坐北窓好風竹間至楚騷偶到眼開卷已心醉愛
君君子心湛身抑其次自靖各所安苟難豈所貴非渠
工語言誰遣忘肉味

憤憤綺紈兒客或大其宅長公抱曾竒所向有削迹窮

達呀可驚賢否乃什百請君勿此計計之當浮白九品
寧用評四并良可惜

細閱史氏書宛若身所經夢錄以命之過影紀虧成一
堯間十秦寒暑倏變更我起千歲後遊心於大庭俛仰
海塵揚鼓舞天籟鳴紛紛閱過前表立俱志情

子讀史名
以夢錄

達觀無畦畛自狹叔季風典書有佳釀飲徒常眼中彼
醉我俱適未覺介勝通剛制免寂寥政復人得弓

少從師友間雅意效一得中年彈塵冠欲起復回惑初

無輔時具吾責良易塞即今禹紹舜羣俊萃王國臣猶
自知之環省每愍默

昔人蟻壤遊方復詫貴仕回首辭窮約投分感知已鄰
鼓驚邊隅得無秦養耻戰酣日為却血尸三百里推枕
視窓日前事皆可紀向來心營營乃始得真止彼此誰
賢愚所持那足恃

陶翁出宰縣徑去亦天真閑居詩成集古雅仍深醇坡
翁訪赤壁臨流雙鬢新小袖補袞手千篇準過秦兩翁

閱當世眇若毫端塵熙豐望義熙愛君最忠勤向非與
道俱寧爾著語親自我誦遺編行身少知津敢忘炷爐
香亦復墊雨中鼎鼎蓋棺前期無愧斯人

書法蟹方後

放麩念號鳴易牛憐敵鯨仁心誰獨無天機或待觸悠
悠寄宇宙往往狗口腹君子一飽適庖事不到目寧知
刀俎間宛轉無聲哭空蜚與土穴暴殄無遺育況此佳
風味世肯貸爾族炳炬擒爬沙免介薦膏馥向來橫戈

怒不救搖牙酷醬浴酒拍浮方法忍抄錄躁擾至絕命
耳聞痛在肉淡茹吾能事晚食媚山藪

寄二孫

憶昔初抱孫雙鬢颯已秋眼看與我長歲月如許適我
以薄官西汝為守舍留夢輒來後前歲律歛再周想今
與迺父長我更半頭天姿粹而溫整整靜不浮六經如
取攜八面自優遊落筆動萬言頗能如翁不如翁何足
道抗志須前脩良匠有妙斲惰農無厚收彼哉碌碌者

不源而計流吾言不虛往過是夫何求
右序

阿泰幼儻礪勢若泛駕馬暫別已束髮折節殊曩者誦
書口瀾翻晝夜曾不捨課肯犯雪供筆亦揮汗把才地
校優劣不在阿儒下平時於方兄眇視真土苴念翁少
年日為學不餘暇混俗類疎放秉心迺儒雅兒今頗肖
吾解笑時苟且師匠求有餘好書不外假緬懷螢雪邊
力倍功更寡可用吾季孟直輩古班賈
右序

苦旱六首

旱氣乘炎熇觸耳仍怨咨九重正宵旰解顏定何時書
生身世憂寧止八口饑可復河朔醉欲賡雲漢詩

雨師久退藏風伯恣吹鼓蒼然西郊雲離合太熒侮及
茲一汎灑頗亦清袞暑幾占魚鱗天僅得龍尾雨

我雖甯社居有田不瀕湖漫漫湖水長奈此田中枯攜
文客邊侯劣可輸殘租鰲瘁不識飽愧爾耕田夫

枯旱歲十九無若今歲酷日色雖許赤苗心尚餘綠舉
觴勸睡龍雄飛勝雌伏作意收桑榆前愆儻容贖

蒼生惜死所倚須數寸澤連朝油雲度空勞問雨色豐
歉恐數然造物莫為力定知天屢陰為爾動悽惻
頻年忍流移猶幸稊稗孰稊稗亦已無何以填饑腹時
方迫凍餒執恐昔榮辱儻無意外憂根蘖猶可斲

馬上見賣白蓮者三首

引息度竒暑風日正交戰淮鄉六月春媽然擔頭見香
凝素囊拆濕餘清露泣豐膚專正色一忠百佞賤祝融
迺司花慰我紅塵面買歸一盃適得共黃葵薦

東蕩百頃寬滿蕩蓮結花孤村蓮蕩西茅茨吾所家年
年紅紫盡為春留芳華酒船墮雲錦歌棹凌瑞霞只今
鄉間夢不道身風沙把花但三嗅對酒長咨嗟

東蕩花清晨西湖渺無津涼荷引天遠極目粧面新鳴
榔與鼓柁彼豈尋芳人香風漂我舟領略不及賓當時
賞花句興在迹已陳歌似冰玉友花面俱迴春

蔡秀才求予所作記作詩贈之時蔡移居

古人四壁居今人猶歎息蔡子攜百指亦自無四壁分

絕檳榔求未斷文字癖此行誰知已所向盡艱食予文
久自知不作杯水直方君忍饑雷可語寧此石

彭尉焚巢二首

彭以韋
經名堂

彭家柳邊堂江色潤書畫迺公根柢學衣傳自心會唾
手勲業餘探妙文字外區區青紫計韋子豈君配神物
護揮毫而不告成壞赫炎卷地過椽瓦了無在賴是堂
間書萬軸腹中載迺公洞天理否傾則為泰向來薦才
名開口取猜怪從今柳先生頗為參元快

迺翁五車讀弓劍初一命九十歸田園顏丹眼如鏡客
來不告倦筆落有餘勁霜嚴草花落松柏獨也正吾憐
盼與扎徐閱襄昭定濟美竟寂寞陳編漫輝映翁家戲
綵郎足繼賢業盛雄詞逼王楊奧學窺韓孟援今校古
昔兩翁猶此病今段天試君處此要以靜

次韻章舜舉

天孫望河鼓杳眇河西東參旗映天梁歛作秋夕逢人
生風馬牛未害心期同章侯大雅士抱負難形容平生

萬卷讀會意春冰融小遲風雲期未剖琳瑯胸我頃誦
清句神馳水朝宗識面勝聞名論文得新功炯彼如意
珠來自仙者宮徑作君苗焚執筆吾熱中荒學顧何取
目昏鬢已童惟應得石友天用慰塗窮

再用前韻贈鹽城四士

行李小槃薄海西裨海東交情半新故生世有遇逢從
我二三子草木臭味同業工畫眉嫵飾此冰雪容高軒
一再過向我作春融陳侯犀一角錦腸星斗胸章侯金

百鍊學派傳正宗楊侯較諸楊朝墨收儁功王郎天地
間合侍明光宮我老一無可短翼羣蜚中樽酒剪銀燭
詩錦佩奚童寬破十日留文律得細窮

次韻王解元賃地築屋

饑麟不落毛士生常百憂何人金為埽振客不待求之
子磊砢胸貯書不貯愁焉知奉二老百指借岸舟方耐
冷侵骨未暇吟掉頭目前悒懔託急於溫飽謀詩來愬
窮狀讀想寒颼颼我亦寄別巢其拙真病鳩每慙烏所

瞻更羨鷺出幽君看沉沉者生不譚軻邱可食忘嗟來
至寶忌暗投天地吾遽廬此理君信不為親儻可屈三
返無宜休

次韻章時可

般門難呈拙仰屋方自咎詩肩卓兩峰因君笑今又袖
手非不佳拜賜良獨厚翩翩王公孫肝肺衷繪繡向來
傳新作價欲擅文囿妙語再墮前吟玩忘昏晝江濤駭
澎湃風竹聆疎瘦足我學古心如飲得美耐氣無寒郊

寒派續後山後采采葩華林羣芳釀孤茂錯刀合瓊瑤
內索慙寡陋肯如周人朴唾去不一嗅

贈施都正三首

巖巖神仙居不受世塵浣棲身白玉壺眼淨詎容唾主
人敬愛客馬秣僕不餓洗心爐薰前容了舊經課

雨窓舞晦明風竹作騷屑斷無思歸夢人境兩清絕道
人氣金玉妙論挾冰雪未須金鼎丹始可黑霜髮

欲觀芸芸初當求根極地古今貉一邱貴賤魚千里織

雲翳太空玄珠在深水安得數年閑與師商榷此

次潘德久韻

潘茂和買妾不成其兄德久有詩即席次韻

沉沉王侯居列屋皆妖妍性斧糜春葱日詫歌舞筵孰
知山澤儒超然廣文氈野花供嫵媚山月獻連娟潘郎
真吾徒常加視後鞭居無鮑生馬紅粉風蓬旋張公為
石奴處仲政復賢繼今看遠業賤子當留年

次韻章茂深安撫見寄

引領數仞墻坐歷幾秋仲西風度凝香稍羞文字供使

君今退之一眇士輕重碩德金玉天畀為吾宋鄙夫
老世紛萬事曲肱夢向來竊膏馥編綴飽吟諷此詩含
古意羣騷之橘頌理窟有餘地猶許一醉共名卿壁一
雙豪士笛三弄侍公眼生纈聊目歸鴻送

七月附米舟之浙中作

白虫散如蛆黑虫聚如蟻循緣仍啞齧欲寐復九起吾
舟玉為粒生此果何理神竒作臭腐秋暑况如燬人生
託洪爐一飽蓋分爾臨流念彫年胡迺置身此笑口忽

惜惋曼膚或瘡痍隄防費應俗情偽良不美短籬護松
菊吾歸殊可喜錐刀詫朋儕嗟爾商販子

召伯停舟辟雨

去年是日之山陽辟雨繁梁作菩薩蠻云

窓度荷芰風舟艤鴛鴦浦落帆憩篙師辟此白淙雨長
征取愜快留滯不云苦適喜縣麻執為盪鐸石暑去年
舟繫柳卧看虹飲渚龍公會事發尚記跳珠語崎嶇不
諧俗似為龍所予一盃酬新涼開瓶先酌汝

過樊村

襄鄂二千里何啻三百灣風色九順逆左往復右還舟
行已三日沿流不作艱即今蒼煙面猶是泊處山信次
有定期曲直了不關聊可供戲事輕橈與回環

呂城待闌得陳魏二生晤語

呂城望犇牛道里不作遠徙倚不容前奈此河流淺窘
步客懷惡癡坐僕夫倦班荆得兩生晤語忘旦晚文卷
得細披湯餅亦粗辦生須朋從樂時亦慰連蹇長吟行
路難回首偶耕願卜鄰儻君等老我幸無怨

贈楊伯時

璧月無纖翳冰壺不受塵西京子雲裔有官居士身今
代龐德公淑質秉大雅生事一邱壑龍鳳拜床下緒餘
辨官業膏馥付爾曹詩聲華岳重士論錫山高京塵逆
旅中初喜識芝宇鄙語愧呈拙有底極推許漂流當定
居久計浙西東他年結詩社未嫌後從公

送葉主簿楚州應錢帥之招

主簿已
七十

漢庭用少餘無策銷外侮充國七十翁勝算定樽俎夫

君譚西北萬里真目睹諸將失投機遽豈一二數形勢
可聚米君王未借箸江湖五十年帝閣嚴九虎後生不
更事兒戲議邊圉圓方殊杌鑿寂默忍羈旅平生干霄
氣百吞不一吐白眼閱流俗閉口避爾汝山陽文武資
幹國今吉甫清嘯臨籌邊志已無驕虜經年虛代舍須
君作謀主心嗤區區鄭緩不省之武盍思度外意徑略
紙上語山陽吾未識彷彿夢眉宇斷知磊落人衆棄能
獨取一卮勸臨分三歎欲輕舉杼君胸中竒定作商應

羽還應訪隱淪道我聽鷄舞

次韻王解元

觀名計利心惴惴日交戰洪濤探龍睡赤手投虎圈孰
知青雲士眼靜不汝眩中年琴書趣早歲林壑願我無
適時具未敢厭寒遠政須營一醉尚喜春酒賤前回所
探花撲藪已如霰把杯臨清池纈影中流見可須催歸
語且領提壺勸向來眼中人此客頗嘗見兩王風流絕
聲名到朝彥新句如破竹脫手金丸轉石交可忘年時

亦共酣醺春來景物好題品遍詩翰鶯花不無情向君
真自獻

贈錢郎中

利方利祿媒抱道俗不省詩書工發冢孰起世儒病錢
侯挺直節蠻徼復蘭省劔氣夜星明鷗駟秋霜耿上前
論世務萬乘為首肯平生中原慮壯歲左符請不作黃
閣想擬試白羽秉孤忠當寧知宏圖時宰領羣兒須圓
曲謂可力勝命彼此計乘除得甕喪崇鼎平生信所得

一鑑照萬境幕中辭脂韋客右進嚴冷主簿聳牙伯評

俗怒生癭

謂伯永

令君強項翁爭事不藏頽

謂劉山陽

但有周

舍思可無衛武警我亦意行者泥古志未逞朝來聽名
理剪燭延落景寸田殊易荒有賴剔榛梗效竒乏良策
汲深慙短綆惟期佩公言不墮頽俗窳

次王仲衡尚書鹿鳴宴韻

儒冠幾經秦士貴始藝祖英雋承上意不止工造語文
風逮列聖秀異彌博取即今再太平比屋務稽古先生

國元老曩亦原夫舉倚相能邱索吉甫允文武後生藉
膏馥掉臂雄藝圃豈伊鄩無譏敢睨大國楚諸生觀國
光名欲窺龍虎初非意敢料顧為公所與蕙蘭侈芳筵
肴核富雕俎酒行不待醉闔坐喜欲舞妙句韋白前拭
目嗟未睹豪氣倏賈餘舉舉陵天宇懸知三千牘去作
虹霓吐我坐廣文氎勤拙初不補看揮修月刃穩送搏
風羽傳燈知道尊食蔗記茶苦明年公東歸商衡傳巖
雨附翼偕渠儂遠臣觀所主

再次韻謝王仲衡尚書薦章

襴生布衣兒始未容黃祖一鶚輕百鷲名已騰薦語跌宕噤不施衆笑此何取一賦出緒餘已可光近古先生傳正學抱負幾文舉名世昔退之好善今衛武汲引略權近論薦及農圃高義表一時惡氛可消楚俗方急梯媒中表羊而虎低顏下氣地百請幾一與代舍著衰翁秋芹薦侯俎泉甘困深汲袖短妨妍舞薦士不待求昔聞乃今睹傳毛可飛肉矮屋俄廣宇平生氣輪囷非公

向誰吐小當工撫字大或效遺補長風初借便振迅顧
雙羽未妨著書緣人有譏自苦朝來詩興動毫端鳴急
雨夸似鱸堂生頗見此賓主

次王尚書韻呈石湖

聖經三百篇凜凜詩鼻祖日月懸太空不作雕篆語可
學不可議仲尼親去取變為屈宋騷刻畫已愧古曹劉
驥駉騁沈鮑鴻鵠舉並稱五字雄繩墨蓋陵武甫白壁
萬仞眎彼柳樊圃又如曹邨鄭屏息從晉楚黃陳嗣前

作風壑嘯兩虎公生四子後相望心相與溟渤無棄流
酸鹹或登俎取源自聖經長袖固善舞清篇神所護近
句誰先睹鄉來儀朝行拱揖尊帝宇出使辭氣振前席
情素吐非公任安危袞闕幾不補歸來將詩壇越竒傳
之羽陳黃伯仲爾胡復用心苦學力我枯涸進冀濡教
雨首肯公不疑更用詢季主

次前韻贈龔養正

淮鄉富竒髦歛衽讓乃祖及今戶相矜十襲藏妙語遺

澤有源水豈直輪一取夫君典刑在落筆更醇古白眼
視公卿矧肯睨豪舉世味淡如水進德吾孔武四壁但
圖史一飽問場圃脩眉冰玉顏初服仍楚楚團蒲芥軒
寂索手繫雕虎客來輒欣然詩就寧漫與自云窺官達
束身著高俎肯思麒麟楨強作沐猴舞見笑寒如水如
曉不自睹君眼高一世天光靜生字寓意文字間軋軋
鹽緒吐后皇急幽側員闕多未補當儀振鷺羣亟下冥
鴻羽鄉來受屨地幽屏良獨苦蓬萊道家山金碧上煙

雨反君招隱篇長懷報明主

大雪復用前韻呈王尚書

密雪何自來雨彌雲其祖史臣紀上瑞外此可無語帝
豈為詩設偏為詩人取梁園謝家庭麗句傳今古玄冥
老更事厥職甚脩舉屬者甫見白今者復接武賦形想
像殊玉田瓊作圃定知懷璧人踈足不向楚天孫事遨
嬉開闕叱九虎剪水幾何時下土均付與羣僂燕青冥
酒所未徹俎狂撼白榆花笑看風處舞林巒帶城堞變

滅眩所睹安得鶴背游一覽了九宇頗煩孟光請杯覆
詩不吐海圖折曲折兒女粗紉補明年麥秋好落磨收
鵝羽盍賡屢豐謠少慰田家苦嘉應自邱禱不待書閔
雨飽飯對翻飛此惠仍地主

祈雨齊雲樓

與羅春伯提舉
露坐索詩作

波涼魚初浮露下蟬罷警胡床俯前池妙意吾已領主
人絕俗姿此地背塵境霜華耿玉宇璇漢轉金餅桂娥
不無情與客閑弄影紅粧擁千蓋環坐殊秀整盤珍供

剝茨水厄停煑茗

羅以河魚不飲茶

清譚略逕庭快若客醒醒

不辭僕頻更頗覺夜彌永
明朝雨一尺重約追霽景
但恐閑麈尾鼓吹鬧蛙黽
適聽步虛聲縹緲碧雲頂

次韻諸公清樾軒詩

塵中望青山防有移文阻
誦君清樾篇頓忘三伏暑
想見松風底樹羽仍設虞
山靈莫逆友獻豈煩縞紵
招隱未容反陳迹渠能序
詩翁麋鹿姿窮不問唐舉
歸誅故山茅吳鴈馮寄語
君寧山中人居州定王所

代羅大著遙題雲巢

高人玩世心仕學有餘裕稍償俗間負未忘塵外趣結
巢依莽蒼泉石得佳處牙籤三萬軸遮眼豈云蠹鳥哢
巖作屏脩然不移具時招檣山雲蒼白繚牕戶徑潤樹
罩煙庭虛月含霧萬景供旦夕與人美無度園翁垂綸
叟或許陪杖屨我亦漫仕者雅志買山住即今想像意
未辦魁傑句他年登君巢酒所尚容賦

次韻胡學長喜雨

胡君著述間動作千載計雅奧三百篇挹取欲無藝一
源發至醇萬象赴傲睨平生笑此癖論交惜晚歲君詩
信入神我眼本無翳屈膝邢娥前酬贈慚醜戾憶初拜
雩壇遽恐枵腹斃徒然陰樞縱寧止乾肺噓敢徐救焚
步頗徇非鬼祭端知世興道密若有司契神孚聖君德
家沐良牧惠天人隔顯幽論理不論勢朝來望阡陌白
水漲天際歌呼滿中田不勉渠自勵黍稌分後先稂稊
易耘難清泉向小歎比屋念遺穉饑飽巧相補上帝亦

已諦老夫辦疊期是恩良不細僂曹有佳招天閣不堅
閉長安粟一囊或許引前例不然買青山補破仍茹糲
出處顧何心一漚寓斯世衆雛能稼穡暇日訓孝悌相
望渺海涯恩慙未渠替張侯本萬中蘇子勞再說排霄
眄世儒笑閱風外蕪草麻侍金鑿雲空澹溶洩丈夫要
特達不必須援繫即今轉園句可薦五方帝如今縣麻
雨立見萬生濟

贈鍾汝楫

坐窓雨蕭蕭出戶泥活活旅食向六旬淫霖破七八舊
新佳客斷局陋不可活鍾郎卷銜袖詩與人秀發誦之
未數帑驟覺陰氛豁壯如秋濤湧清比哀玉憂騷人詠
香草不足供採捋詩人深堂輿掉臂欲排闥應接殊不
暇愧耻那容刷正宜長聚集慰我抱饑渴不見動十日
有力苦見奪轉頭二十年夢覺幾電抹我甘飢五窮子
亦狼載跋川增得深敬外此本毫末別語忽見論回腸
隱膠葛乘除等寒暑休王有回斡豫章出林遲出乃千

丈拔天居五雲處往矣儕俊傑當念淮山陽有人晞短
髮噬肯回葉舟譚妙共蔬糲

題徐居士遯庵

世網誰所張四彌天宇大萬情本一機矻矻同此在徐
君經世心心乃超世外趣靜緣有動無顯奚用晦姑為
辟俗去示世無吾待結庵定其遷初不憚一再容膝得
勝處外物了纖芥有山自煙雲有水可灌溉百丈峙翠
屏千尋拖碧帶床頭三聖書會意謝分掛天山得要旨

肥遯元非內此名扁此室吾詩儻容配

次韻徐秀才十首

以才子富文華校
讐天祿閣為韻

冷官卧漳濱書奩漫棲埃
魚芼瓠葉局縮養不才窮
鬼不受送與君作陳雷
將軍視將浼夫豈餽無臺

杜陵將詩壇受軟湊多士黃
陳大其傳券契密付委徐
君萬卷腹詩作風雷起春秋
富有餘著眼置餘子

向來益浩然醉眼高宇宙清
詩落京師蘇李欲束味蔗
隴槎頭鱖未覺黃金富
纖鈎餌蝦蠅但取浮陽嗅

翁赫公侯門下客亦方聞慘澹埃埴地高賢絕通津
書分此老華國須竒文渠觀有旁招子行當冠軍

毅毅掛榻翁孺子來如家長安聚蚊兒車馬紛囂譁
孫會兩窮韶顏映蒼華長嘯叙孔李驚翻籬角鷓

霄霏上冥鴻山霧卧文豹餓鳩嚇腐鼠啄啄詫飛趕
吾徒為已學欣感置不校小草或遠志詭遇乃近效

鈎妙如悟禪去瑕等居讐學詩得是法善刀無全牛
脫手希代珍願子毋輕投袞袞譚項斯愧非古人儔

閱世難衣食眼中子能賢萬像入吟筆摹寫皆其天
子我荒學一字不蕪傳子家文章錄得書或牽聯

釣湖鱸紅鱗斲山飯黃獨書生甘若飴八珍不在目
出處有餘裕顛顛營寸祿一舟指三徑不遠儻許復

堂笑伊優登米笑侏儒索見笑與笑人等可付東閣從
俗心易波矚理眼無膜但求種秫田歸療酒腸涸

次諸公詩韻

去年略憩成倅小築約今年同遊
不果諸公詩卷來索和章感而次

韻成有歌
姬甚點云

墻圍護風煙簷影納紅綠城西百弓地論價指和玉滄
浪取具體輞川儼遺躅年時得小憇振衣休汗足山靈
不留人定復厭棖觸坐想散花女深堂伴金粟今年桃
李月僮馬幾裝束竟成夢魂到永歎春事促此亦志願
違世有谿壑欲似聞偕六逸

成仲鄰句
會凡七人

碧酒仍艷曲風

鶴羽人下露花妃子浴詩卷肯屬我為洗顏面俗元亮
晚耒耜彌明舊符籙可須白月前熠熠度螢燭

八月晦試院中作

官居課程地生有文字癖誠知蝨負山詎得辭此檄嘉

禾古多士孰者非巨擘老眼不待封舊苦眩花隔勿云

石賈玉箴失眸亦得

荀子云失箴者眸而得之

捧心若為妍竊鉄徒

自匿陸海貪窮搜竒寶多偶獲巧常昏金注勇或便大

敵清醪聆鄒琴款識辨周鬲頗收半段槍遐念連城壁

渠應悔羔袖吾敢厭鷄肋撫囊褫利穎體國免素食明

朝羅客拜定自百夫特俗無拋塼惡歸舟緩張席


九月二日

燈火一樽酒笑語亦固然如何棘園夜憶歸不成眠哀
懷動多感妻兒須眼前人生四方志誰遣霜覆顛

次韻袁憲閱兵許浦

皇澤泉及瀕戎索均帝闕邊屯笳簫地彎弓睨胡月萬
旅皆金繒不待持闕閱于時江流漸極目雲閣雪嬉嬉
忘其寒恩寵自稠疊使星照海徼天意不虛設勞勤需
摩拊勇怯要旌別除器有良楛扣閣許陳列古來分君
憂下敢謝薄劣叱馭陵九折推鋒取三捷况公經世才

翻浪海鯨掣夷吾目中江左佇茂烈汾陽唐柱石守
器未應缺銜命茲小試鼓勇士眦裂指揮用諸將他日
須此傑聖君中興主詔語一見決治具有罅漏詎容惜
捫舌兆朕貴先識沉默真小節鄙夫百僚底欲隱尚不
屑幾登王公門面醜辭易竭向公又一鳴當復笑燕說



江湖長翁集卷二

欽定四庫全書

集部

江湖長翁集卷三

四

詳校官庶吉士臣吳烜

主事臣呂雲棟覆勘

覆校官博士臣劉光第

校對官典簿臣劉景岳

謄錄監生臣龔輝遠

欽定四庫全書

江湖長翁集卷三

宋 陳造 撰

五言古詩

三月初晚晴寄高縉之三首

東風掃積陰殘雨不敢漂壞雲裂裳帛倒掛墜嶺腰鳥
影不作暝夕陽明山椒安得上上頭風露永清宵
人家繡閨閑湖上粧面新湖山簫鼓中魚鳥安得馴山
靈建飛雨淨洗綺羅塵即今隄邊柳為誰管殘春

曲欄倚青冥萬井入指顧湖光漾明霞照我凭欄處森
木倦鳥歸遙空征鴻度定知待月人破竹有奇句

苦雨

有足不下樓有耳祇聽雨一日不可耐忽忽彌旬所軒
蓋斷還往尸居成獨語日色似見慰雲氣復如許西湖
梅柳月裘馬趁簫鼓細追他日夢一笑念縛虎

再用前韻贈高縉之三首

晴色與春違香紅不餘漂出郭縱遠目草長麥齊腰詩

來慰幽獨吮諷芬蘭椒招月作三益庶用娛中宵
閉門雨兩月君來無舊新白眼睨牢石騫飛不受馴落
落含風松紛紛棲睫塵慚非脩月手向君和陽春

高郎客京華好事有左顧儒林丈人行乃得曳裾處亦
知短褐底蘊抱美無度繼今數公間可但傳新句

謝表起巖使君借貢院居

以簡齋詩一涼
恩到骨為韻

書生歎漂流卜築定何日折腰為斗升問舍羨九一諸
公有好事往往遂所乞懸知許黔突當復念容膝

火雲烘白晝悠悠晝日長黃塵撲面去行客汗反漿老
夫清夢起開卷鉤北窓微風入巾袂世恐無此涼

久晴忽一雨為洗暑氣煩斯人作欣感造物無怨恩我
方墮窮塗獨能庇寒暄公亦不自德自笑煩於言

槃薄蕭寺中永歎無客到吾室自勃谿粗免以饑告及
此陰寬閒好風日見勞安得長者車茶餅寫襟抱

槐龍舞脩影頽景忽西沒空庭漾金波坐待月東出臨

風思傳觴沃此支離骨開門拜嘉惠正得杯中物

是日
鹽車

送酒人
適至

寄題徐虞卿醒心亭

人間聲利場疾馳不知反營營計毫末一益昧百損徐
侯大雅士探道自其本策勲虛明地外累不待遣出能
同光塵歸念寄蕭散著亭得勝處竹茂水清淺亭中眎
亭外畏塗塵眯眼翛然得此心萬化無餘蘊老我尚問
津人與室俱遠向來卜鄰計欲舞嘆袖短會當尋此盟
蔬飯同茗椀洒落無何遊共閱世沈酒

昔嘗託虞卿買
屋丹陽價高不

果

餘姚飯

昨暮浴上虞今晨飯餘姚官期有餘日我行得逍遙盤
實剥芡芰羹魚薦蘭椒一飽老人事茗飲亦復聊捫腹
每自愧昔賢尚簞瓢僧垣棲翠微金碧煥山椒龍泓甘
可茹塔鈴如見招遲留本不惡况復待晚潮

車堰牛

牛力輕萬鈞性順異諸畜有足不解蹠有角不皆觸課

日引未耜為人給穀粟私家憂闕食公家要餘蓄公私
雖相須置汝誰取足柰何過堰客行舟動千斛挽牽亦
諉汝顛顛頸髀縮扣角一勞之不語對以腹物生愧無
用懷安或非福於人儻有益塵身豈云酷君看廟前牲
被繡飽芻菽膏血薦鼎俎誰定悲敲鯨

舟行即事

昨日出曹娥明日指慈溪待潮舟為膠得潮舟若蜚留
滯復一快計程元不遲人生意失得孰者乘除之今屈

昔已伸彼羸此或虧但可自適適尚用悲喜為水伯愚
弄人政如造物兒丈夫木作腸渠輩未易知

錢寄定海交代

縣尹古子男今不一錢直低催奉簡書偵伺常屏息白
簡與按章歲月供彈劾當路雖所懼姦民巧狙擊吻間
售蜂蠆意外變白黑防虞莫救過彌縫或逃謫政使有
卓魯未容置形迹云何世難事君不動聲色編民翕風
移惡少且心革田廬有笑歌魑魅亦竄匿斯人紀仁愛

幾磨南山石政聲懿如此僅免繩治厄諸公蜚鶚書犯
嚴尚遺力安得定海民為君灑薦墨蘭臺傳循吏採訪
多失實安得定海人為君秉直筆嗟我吏隱者志在山
南北身名萬金重如博試此擲賴今遺愛地一一可矜
式政恐效西子美顰得譙劇江皋一樽酒聊挽朝天客
妙樂喧江浪清譚倒理窟盟言底遽寒舟駛潮水急西
望念風義感歎徒至骨

復吳祕正五詩

以識子用心苦為韻

武陵邁往氣當世隱一敵揚眉諸公間甘作遷客客喬
孫典刑在磊落抱深識我學謝柳州顧肯睨門席

簿書阻從遊人遠嗟室邇胥徒恠坐忙眉睫若為喜方
賡于為于忽誦子虛子悠然得此心外累蚊過耳

我如不材材自誑無用用向來風月前詩筆頗吟弄低
摧髮皓白無與世輕重枯株欲丹黃因君彌自訟

作宰古尚教宓齊但橫琴唐吏猶易為讀書或松林一
從來海瀕琴書暗塵侵俗有古今異鞭扑違寸心

君詩用功深平處猶近古北斗燦繁星拜賜詫兒女亦
思貂可續中夜攪肺腑攪鬚髮一笑笑翁祇自苦

張丞見和次韻荅之

中年賦遠遊羣僂謂匹敵竭來吏海隅笑死鶴背客昔
人混屠酤不取俗眼識惟應赤城老默許分半席

故人十年別墻宇今密邇譚勝復詩工排日有驩喜所
嗟連城壁過詫窶人子何況政術疎一一賴提耳

我本山林人娛老有日用時須禽一戲暇乃笛三弄言

償作縣責顧敢寶所重催科未妨拙防速牙角訟

張陳舊莫逆雅趣瑟和琴器用異所宜渠觀與山林朝
來覽鏡笑鬢雪無可侵但辦摩衰眼送君立班心

男兒鼎珍食富貴倚稽古不然東山車穩載十眉女可
憐強項令俗塵塞腸腑端如溧陽尉老訴食薺苦

送李象山趨朝二首

象山海邑古稱象山郡今
聽李明府言頗亦費支梧

故云

人將宰象山蕭散目郎署即今撥煩手蓄縮殆難措鄰

分銅鐵名恐坐汙染故髯君十日留曾無疾頑怒德孚
俗風動政洽民孺慕過虞櫝中毀穩下竿頭步定川壯
哉縣曹不揣鯁腐虎鬚有危攬羊腸無善御彼此劇易
間霄壤計相去滿懷血指羞乏君斲輪具鄰輝幾餘分
忽復失強助歸舟不可挽臨風悄延佇

書肘詎容掣箏柱不可膠付事多其防職業自寂寥頗
思圓機士細苛舉網條宰邑古難之茹苦耐煎熬百抑
不一揚推波益驚濤由來法愈密祗為下所操一饑驅

我出銅墨強折腰，捩翅著籠中。側睨鵬冲霄，平生有知已。持橐貳銓曹，君來定倒屣。道我不自聊，願推變通術。霧雨均枯焦，而况代舍舊。肯惜引手勞。

遊慈溪龍虎軒

軒有石湖碑
字如新刻

坐曹可勝勞，出郭復行役。半年定海令，三度慈溪客。慈溪足勝處，山秀江縹碧。終然縈夢寐，遑此事遊歷。高軒闕龍虎，表表市闌側。得興不暇慵，徙倚且數刻。洞戶初推敲，階除旋登陟。向來攫怒勢，枯幹抱頑石。乃知名實

間未易膠今昔尚喜詩翁碑不受蒼蘚蝕可但神所護
人未忘翁德非使老眼明斯遊竟無得

十二月二十六日趨府

誰謂一舍遠不辦三食趨亭午縣市西衙鼓府城隅匹
馬驚鳥去指槌冰在須北風挾霜氣萬象付摧枯想當
折琴絃未怪裂人膚馳裘被甲如是日有若無客首不
暇回顧容少踟躇出處不能同勞逸為之殊龐翁馬少
游似非隱者徒鄉居老躬耕飽溫得自娛婆娑銅墨間

盍亦省頭顱
蒙穠脫中孰
吾口良易餬

十二月二十七日趨慈溪

既到更盡則同官以
新帥夜過狼狽而還

予念從者寒
且勞獨留宿

西風蜚江浪江畔那容立
霰花濺千尺望望客衣濕
小舟艤兩三人已鶩鴈集
側晚波洶洶俯憐身岌岌
垂凌玩掀舞生死付呼吸
前登為回首舟重巾氎氎
支徑不通車車去如見絜
念此役夫苦體我官事急
傍顧中夜還得無僵仆泣
畀汝就甘寢白飯亦周給
徇人多意外

自信寧不及利物身每輕睡覺况六十

次韻王省幹

王以懷君想報珠作詩見遺

南橘合嘉頌為枳緣踰淮黃濁轉眼涸一昨彌兩涯志
士抱根柢千古容興懷後生事蟲篆蟻穴鑿檀槐

一官初有祿三月免無君平時愛人學斲試百一分習
俗南北異所見違所聞致化要無倦儒者貴長文

王侯文振竒人作高山仰世學方波頽渠獨不流蕩諸
生畏雄鷲六藝厚涵養遙知落詩筆高像寄逸想

叔也過我門往往接羅倒甚以元亮止終然劉伶禱我
此待騫翔夫合戒陵傲惰遊置耕耘曷怨鹵莽報

大匠成風手器就不待模老夫默自哂堆豨守一隅論
交獨何幸魚目儷明珠他年君鄰墻作意營一區

次韻張丞

政平民安之不在書上考君看道傍樗蒼雲陰合抱明
時話英躔佳氣指蓬島孰知嵌巖幽乃韞希代寶張侯
儒而吏笞筮環臺阜政聲載輿論文價動諸老學富食

猶貧志堅進不早即今紫霄人豈必皆橫草亦知名煒
燧曾上薦士表靜女家無媒深閨自媚好胡寧倚昌丰
濃抹且淡掃會看邢娥前妬婦付絕倒

謝制帥高卿剡四首

宰邑非良才朴拙普信已曾無補毫髮粗不畏首尾倚
公造物手襲壁護玷毀世有百謫餘觀旁首重稽

薦書未及門啁鵲拂人衣盥手袞字褒祇遣顏忸怩瑕
瑜僅相償葑菲終不遺窮途石作腸持用答恩私

去年來甬東旄倪喜動色公今畫船西行路亦嗟惜去
來本何心民自作欣感達人了世緣八極付揮斥
論世究德業先生處其全欲議可斷國餘功猶護邊此
行雖暫屈冢職正急賢璽書起黃霸摩眼待新年

次韻張守不欺堂

鄉守張仲思以不欺不擾
堂二詩見寄求和為次韻

使君古醇儒內視保良貴芸芸鏡中影了莫遁情偽賦
芋豈至術機灌彼誰子退食一堂間百事反諸己床敷
但詩卷庭砌亦屐齒洞洞靈府閑拳拳聖言畏獨傳迂

叟印不作俯仰愧何當拾級前拱坐商略是警欬付元
城歸詠如闕里從俗倦執執得意風雨會

元城問迂叟
學誠所入叟

云自不
妄語入

次韻不擾堂

取民狼走羊勝之楚克庸孰知號名初已賦大小東賢
侯守此道力若拔山雄深堂玩閒寂翠影環蒙籠泛應
得天遊靜鎮副上衷樂知前池魚吟當北窓風情寄埃
壘外俗自和氣中高吟與傑作鏗砉而春容無欲民自

朴契鑰今古同即今美化孚袖手自即功坐令鞭蒲捐
寧遣馬力窮我心偕郡人會當志願從新年鋒車南帝
渥看稠重政聲潁川上可庸不作公

時子宰定
海未識君

宿雲巖山

是夜
大雨

名山邦域中每歎夢境隔如何夏而春共苦活水厄向
來夢中山真作綠雲升夜氣與僧話凜凜冰壺清初宵
潺淙聲大慰望霓意睡醒鐘魚鳴猶是翻盆勢不因官
事驅寧許山門留况今浴種天頓釋嗣歲憂雨既副我

禱山亦入吾手一旦二喜并誰謂終不偶涉世嗟聱牙

天頗憐其窮更持靈臺香歸謝淵德龍

定海有淵德觀祈雨所也

李伯成食甘豆粥和淵明詩分寄次韻

八珍較半菽豐悴岐兩端志士僚所逢心泰體亦安李
侯貧食粥吾獨於此觀竈婦不餘顰鄰券有後還顏帖
孰嗣之范叔可勝寒破碓砂瓶前蘭佩雜木難堂堂五
字律銜鏗凜莫干不羨侏儒飽寧追陋巷顏挈瓶肯見
分特特扣荆關讀詩良起予投匕忘悲歎

次韻解樞幹二首

我方首儒冠頗亦易此人尚友卑自漢讀書考先秦士
或暗鄭朴識面蘄卜鄰計疎志空勤敝帚浪自珍口前
齊東語曹欲潤帝綸學如村社醞百醕間一醇老藥媚
衰紅飽閱姚魏春顧慚誤題品五字極清新君才允文
武行矣拱帝宸余年念桑榆歸去儕編民

阿文鈍于學莫計故新年向微他山錯詎徹醯瓮天論
交置才否如君政自賢為導有源水俾加視後鞭譬彼

千仞登投足得攀緣君生英衛家造詣超儒先餘論分
吾兒一一當手編繫我液欄木卧沙不受鐫鵲音曉見
諗羣玉紛墮前政使高帝價敢蘄世儒傳

題張仲思孝友堂

筆端吐陽春胸次著雲夢袖中匠石斤規矩隨意中君
侯道藝樂不許俗子共深堂埃壒外平日文字供默對
八窓靜不但十年種妙語落人間一一萬金重平反與
進脩併作旨甘奉只今衣五綵頗亦笛三弄何人侍板

輿觴豆燕羣從鵠原春事繁鴈影天宇空傍晚梟雉呼
或作鄒魯闕紛紛手翻覆納納腹空洞汲直合居中器
博滯近用初計技薤來竟息憇棠訟脩然擁書坐竹風
助吟諷更聽雛鳳鳴未妨蜚鴻送今皇志復古俗有後
賓貢斯文屬耆儒夏屋况巨棟江漢繼崧高誰當第嘉
誦縣知尹吉甫縮手辟張仲

次韻嚴文炳暫別歸吳門

且堅仲春
歸來之約

白駒繫維之君乃再歲住政如荷蓀翁鷄黍止季路得

句推敲餘每肯向予吐平生識丁字頗亦指佳處只今
妙著述詎云工訓故東陸方播和南雲遽回顧似聞漢
諸公交口河東賦挽袖不轉頭歛作翩鴻去郡舍雖舊
約侯門有晚遇可忘酒招攜况識棋勝負老景樂事稀
春意駿足驚無令歸驂前怒風塵花絮

再用才子富文華校讐天祿閣韻贈周教授

仙人藤陰夢金骨窖黃埃當年晁張雙縮手推其才陳
編且千載萬蟄聽春雷偕公開弔古文遊但荒臺

步屣城脚園蒼官拱綠士向來錦打圍轉首就紛委流
光不貸客感喟中夜起肝腸舊輪困言賦子虛子

胸涵陽秋筆眼高古今宙周子定可人萬象棲一味眇
晚紉綺郎自詭多文富世有九鼎珍唾去不渠嗅

窮途有快意辟席得異聞青天千萬里翳日帶煙雲今
者君子後滿窺崔蔡文當此陣堂堂歎我提孤軍

矻矻守枯策頭童未起家居陋婦勃餓食貧兒謹謹養
高有驚岸戰勝無紛華黔浴如可移誰辨鵠與鴉

徇物笑蠻觸自守等毅豹寸壤聞蚓吟九萬觀鵬蹕孰
知塵外士戴目嬾此校營營彼誰子磔蝟計微效

審知才非充敢怨言不讐進乃隔九虎退且辦十牛向
非食不足此檄當徑投黃馘漁樵翁揣分吾其儔

君家小阿韞擇壻須才賢我家小於菟披霧欲窺天鵲
語燈著花妙契默有傳何當珠簾外綵絲自相聯

萬木同一秋松栢正也獨夫君閱流俗塵過不留目我
昔甘曳裾低首問宜祿及今君子前玩易愧頻復

假板未通班此氣渠容索周友萬卷腹小却石渠閣培
學虎出翼息妄眼蛻膜何當去為霜萬壑正枯涸

別俞君任通判三首

客舍不宜久黃塵翳衣纓非君此解后孰使老眼明握
手雜談笑洗醜共濁清已燼銅爐煙倏聽丙夜更清詩
相勞苦凜然見高情珠璧眩璀璨珩璜競鎗鏗寧惟老
眼明亦使病骨輕語離信所重未敢促歸程

一代石湖翁韓歐或其儼當時出門下如君屈幾指論

定難為才我乃輩多士
椎成方未器正賴君礪砥師友
繫魂夢栩栩輒千里驚見得此客
乾鵲預為喜一笑破
千憂天幸寧有此石湖倏眼中此翁真不死

房陵望毗陵計舍六十餘今我從遠役羨君方逸居逸
勞不足道會合嗟愈踈向來江南北二年能幾書殘山
賸水地詩題當不虛得句茹不吐思君定愁予溯江日
千里豈無紅尾魚交情儻未忘與問今何如

書隱靜寺壁

丙申秋入隱靜未到雨甚苦行
既到遽晴迫官事即去感而作

籃輿初半塗飛雨欲無路到山臂屈伸赫日照窓戶山
靈太孤介深厭俗塵汙雨似難容來晴似推容去書生
林泉意此癖端有素俛眉紅塵中正以五斗故董董三
徑資渠須畢婚娶出既非得已歸亦奚早莫他年五湖
舟何殊一杯渡卷舒吾自由誰招復誰拒

贈臧文仲四首

青山玉所蘊下此翠鳳雙音含古韶護身非世文章衆
羽不敢睨謂是聖時祥有人摩老眼側佇雲路翔

夫君根柢學宜我屢即之罷馬取長道顧肯過我為索
寶黔婁家怪君焉取斯頗嘗見此客且用詫吾兒

理以定故明用智或成疎芸芸自根求一一皆我儲
饑糲渴須漿水固不宜車請君默自燭是物誰欠餘

始吾泛其觀中吾固其守拳拳寶所重世或輕敝帚
廐馬我所師家鷄誰得有此心如此用煩君訂是否

戒飲三詩

并叙

予中年病于酒以飲自誓謂不當自賊亦不以賊人飲客多寡聽自酌人皆笑之然向病

脫然容亦未始因吾病臧子子儀獨不見笑
且曰某不能飲見虐以酒輒病求子言曉容
因信筆申其戒古人之詩語工而意婉使人
思而得之思而得故得之深守之固後山秀
骨畫眉是也吾亟欲為臧子益故直書
而詳為之言不暇為前人也子其識之

毒痛痛受辛斬刈憎暴秦杜康與儀狄賊物其罪均商
毒烈火炎岐鎬方陽春秦暴虓虎搏歐粵無顰呻二子
起酒禍古今同湛身計實乃鳩葛適口良甘醇文錦覆
深穿病媒鬼之隣剝殺不遺迹辛政猶為仁今子知所
戒薄俗豈其倫生世千金軀况復富席珍

中古避世者或以飲自名世網未易脫顛眩寧其情嗟
哉竹林子齊茹日瓶罌時既謝周漢顧肯羨久生中聖
憐徐邈種秫想淵明卯金當塗高委質吾顏頰偕我偶
盛時生亦未易輕况子淑茂資天驥趣脩程論才應時
須挺志為親榮親言銘肺肝盍師陶士衡

自我銘盤盃覆盃遠麴蘗人或安清脩身亦享黃髮柰
何悠悠者沈酗無虛日言之每逢怒周誥存苦闕狂悖
貽世戒氣血曹中竭持觴勸客意彼肯獨夭折投轄車

鈴頸抽腸擢其骨交遊多若人自重要勇決關須太虛
閉交繼叔夜絕毋興聖賢悲濡首右臂折

司馬子如飲
孫寡寡即死

高歡謂折
我右手

邵伯阻風小泊贈送行諸公

長征每愛日小泊未選意陰風自南北客子聽軒輊召
棠望吾鄉不作秦越異船閣鴈鷺洲人穿魚蝦市相逢
各吳語知識十三四水實不自買海錯有佳饋餞行餘
十客超俗見友義笑譚寒谷春為我洗羈思相與卧玉

瓶跋燭得微醉老懷易作惡別語毋動喙

次韻丁判院

丁方謀
保職官

丁侯袖詩來容聽媧皇絃
咀嚼冰齒頰如漱錫谷泉露
花有餘姿風漪自成紋
中含班傳香竇絕郊島寒汗流
竟後塵何有一字難
明月墮我側盥誦喜欲顛
因君念漂零俛仰追昔年
門間半面初隄柳嘶晚蟬
寒暑機不停奔駑履欲穿
客舍此相遇把酒霜鴻天
男兒氣干霄猶受稠人憐
似聞國士遇度外置拘攣
渠信造物兒賦

予終竒偏凌風謝垢濁仙者一探九多肉彼下乘更趨
驂騑前我老從斗祿纖鱗潛重淵饑火少見貸歸志久
已堅自甘尺蠖屈何與風鵬舉會看鶚書薦領此雲錦
篇從今拭病目長風駕蜚翰

泊瓜步

擁衾迎鑿曉艤楫瓜步夜問俗鄉音轉束縕野宿乍去
家倏兼旬取道逾三舍江神雖世情羈客忍陵藉初趨
風色好忽復帆席卸泊舟市區外繫纜古柳下遙聽波

浪湧未息妻孥怕譙翁身世拙衷貨迄未價榮望絕臺
閣歸計盍桑柘男兒四方志肯與衰鬢謝古人出處間
分取世俗訝呼酒把譚塵捫虱復王伯

魏帝廟

佛狸歲未卯志欲吞宇縣當年江飲馬腥血浸淮甸無
人飯耕牛有井巢歸燕至今閱遺史為汝空飲恨緬想
爪步留殺氣纏吳分云何此山椒遺像儼高殿無乃甘
事讐吳俗昧所見或復綿歷久後嗣忘敵怨冥漠彼有

識福汝吾敢信君看趙與薛狗國冒禍釁魏侯繼前躅
長呼死白刃胡不尸祝之香火均遠近豈但祈神休抑
使頑懦奮誰今決從違引手適我願

趙侯立薛侯慶魏侯勝皆淮南死事

也將也

長蘆寺二首

梁帝號用儒顧有佞佛癖區區泥其粗佛者寧汝即矯
矯隻履翁談妙塵可析冀上一言契何意水投石瓶錫
翩然逝北去甘面壁有道惡驚世應俗肯留迹一時起

誕罔千載受誑惑至今利涉地傳流何荒惚渡江一葦
爾古今尚遺植紛紛捕影徒唱一和者百遠渡有浮杯
行空或飛錫至人果善幻幾何異鬼域世人墮邪蔽狗
虛不計實我學謝傅韓艤舟重喑啣

昔年望長蘆去江逾百步垣宇呀已缺浮圖歌欲仆僧
徒噬肯留日有沉溺懼重來舒望眼佛刹非故處安衆
得亢爽定遷疇夙素似聞瓶錫侶復作醯蚋聚居人禱
蠶麥行客乞泉布營者肆夸侈施者不顧慮百堵煥金

碧奚翅復其故往往豪雋人四壁有未具彼徒創寺意
取鎮湍濤怒向來梵唄所倏為蛟螭據在已不自保誘
俗說依怙波流置不省此理吾未諭

泊龍灣

闕

沙觜沙外仍奔湍是間以龍名信乃龍所蟠浮
煙澹寒鑑斷岸圍清瀾孰知面孰要中有水府寬我來
艤倦楫天水夜茫茫狂飈吼薄暮驚浪摧舊灘鯨鱸碣
厥居渡鳥垂羽翰孰睡不知曉夢次聞平安龍公自兼

愛况此行路難何以荅神休幽佩紉蘅蘭

龍灣看初日

江聲夜寂絕江霧曉空濛亂霞映淡日隱隱空濛中
羲馭巧呈瑞不與他時同炯然玉奩靜泛此瑛盤紅分明
三足鳥依微絳綃蒙曾穹歛氛曠幽壑舞魚龍昇從海
僊府光射河伯宮遙想麗帝闕佳氣正鬱葱鸞鷲同虎
拜三呼并神嵩散人得壯觀醉約持釣翁

舟中除夜

老境閱流光，翩若下坂車。除夜更深念，繫尾留去蛇。

詩

云昔人老世故，亦復興此嗟。迫歲况羈旅，孤舟如泛槎。

妻孥共蓬窓，偏側棲樹鴉。撥火話鄉國，悽愴雜笑譁。桃
栢粗能具，爆竹知誰家。歛聽鷄鼓翼，尚看燈結花。遙知
諸神曉，共正青帝衙。我亦東風前，坐待帆影斜。

草鞋夾

隆岸圍小河，紆鬱江之隩。初看一泓窄，旋望百頃渌。舩
艖與下瀨，山屹復雲矗。自治貴不試，此舟江左腹。向來

胡騎南勢若撼坤軸飛城截中流羣孽頸為縮元兇坐
自斃犬羊僅還轂千齡有機會二豎方角逐武剛環貔
貅突騎驚陵陸古今常勝術所投副所欲神州久望望
廟算佇復復區區計自保膠柱難為曲客行寧賈胡小
泊遂信宿撫事空三歎為儒慚碌碌

泊慈湖北岸

坐覺江流平漶漫裂三股舟子告風橫因循宿中浦慈
湖古戍近猶復小江阻漁翁家葦間蝸舍無鄰伍把酒

訊三老此寧泊舟所諗我今昔異解帶無所苦向來探
丸徒白晝猶旁午一自尚書來此輩凜刀俎江山亘千
里有屋皆外戶似聞襄江道衽席過行旅翳公舊威愛
平寧尚如許兩地好經行為官喜欲舞倒床鼻雷吼夢
破聞船鼓受欺墮姑息迂儒彼何取

謂張尚
書定叟

泊府口

建鄴重東南爰從吳晉後鎮戍分淮江心腹運臂肘我
舟歷陽岸煙外見鍾阜問名良賓寶南渡此其口龍蟠

虎踞地永藉藩籬守六朝或易之戎馬輒騰蹂鐵山此
濟師竟致凶渠走扼吭儻得要制敵果何有設險務究
本不獨計山藪任吏所宜擇撫民所宜厚孤生恤緯意
南望凝竚久深愧行歌人招邀話佳酒

采石渡

大江礙崇山突起作湍悍采石天下險揭厲誰敢玩戈
樓泊千艘鋒旗麗天漢昨憶辛巳秋胡馬蜂蟻亂敢觸
貔虎怒旋作狐鼠竄繫此折其角羣孽終內叛孤亭試

一登明眼得竒觀回首吾葉舟已復艤沙岸我犀不敢
然幽察神所憚歛聽鈺鼓闕戎事閱鵝鶴折衝須武備
保治賴彊幹鄙夫華封祝泚筆亦其漫

上下驛磯

湖陰數里間山麓屹兩磯磯麓突江出禹功不及施千
古妨行舟死生繫毫釐我昔步磯上雨歇暑氣微驚湍
下百尺怒勢轟千輦尚憂坤軸動無恠沙岸歌螯龍渠
得安過鳥翅欲垂頭眩膽為掉坐歎舟上兒壯哉天下

險姦軌容抵巇如身護風寒要地此幾希今來歲華暮
去舟良坦夷人言水進退寒暑分盛衰古來設險守亦
有可易時函谷與劍閣秦漢嘗用之人輕地亡重正煩
折筮咎恃險無興國興國須藩籬帝王所取重文武各
攸司險易倏變改即磯餘可推

蕪湖感舊

下帆同鳥棲掛帆逐鷄起但見蕪湖月耿夜清如水江
左此壯縣我昔舟屢艤諸公各敬客款曲豈今比酒杯

慣邀留妓圍供燕喜流連動十日

每過蕪湖朱丁諸公約以十日為期

揮

掃或千紙舊遊想如昨故交今餘幾逝者泉壤隔存者
參辰似浪憑楚些招盍寄相思字可能喚巫陽且欲託
雙鯉

過繁昌

江山互映帶竹樹渺隱見居人江山閒安處忘古縣泊
舟穴子初舊觀儼自薦崑山高挽雲雲際抹深靛慰我
塵埃容嘉此煙雨面山脚慣奔走尉曹分卑賤縣人應

指似鬢改顏狀變漂零渠未知憂患嘗欲遍俛仰二十
年轉眄閱蜚電故人半在亡在者或海甸明朝理去楫
山影暝江練安得人如山來往長相見

繁昌早發

客行固塵身留滯如振翼及茲祖禮竟蓐食理帆席風
停浪未蟄天曙月正白版磯匯湍殺荻港煙樹碧杖策
丁家洲徙倚容少息無酒問山店憶鱸聽村笛鳥烏啼
松行鴈鵠下沙磧回柁投曲澳又寄糝潭夕情疎或易

合不作淮楚隔纍然槁項翁軟語慰行役

江湖長翁集卷三